

Ngwuja'ri ngwanni ngwullu je Yuwana gi'ra ge'te **Äni kitabanu**

Yuwana gwuru doo'ra dükäjäär ngwoo'ranu ngwükäjäär je (ngwanni ngwujaar Yicunga le). Gwänggädäär aar 'dingini gwondaja aar akani nono. Yuwana gwuca Yicung gwuru ngwuja'ri ngwudi midi, nginde gwanni gwujaar papa gwe gwur'tal (1.1-2). Yuwana gwudiwayiniya ngwüjü ngwanni ngwadi uli ngwuja'ri ngwee gwuru 'didanu ngwani Yicu ndi ari ngwoorta ngwuju ngwonyadu ngwanni gwuru ngwu'duru ngwanni ngwati nyi'rini ndi ari Yicu gwuru gwanni gwani Kirctu (2.22). Aar nyi'rini ndi ari gwuma ru diji dümnä gilingeno (4.2). A ngwikirijin mätinälü 'di'däny ngwuja'ri ngwanni ngwenggacaar je 'tu'tu gerre (2.24).

Yuwana gwüpäcä ngwikirijinälü aar elelle elelleng gwanni gwuju'ru aar ämnäjidi. Ngwuje ci aar änni Kiji gidi Ngwaalu aar 'dengenaci ngwuja'ri ngwüngün. Ngwuje diwayiniyi ndi ari aar gwuji Yicung, nunnu ma ji mung o'ra mana aar gu icinänü ngwäyanü 'dünggüngün (2.28).

Yajang yidi ngwuja'ri

1. Ngwuja'ri ngwudi midi (1.1-4)
2. Midi ndi acajidi gwudi papa na Giji güngün gani Yicu (1.5—2.29)
3. Elellar nono yiji yidi Ngwaalu gididlänü ndee (3.1-24)

4. Ngaa lenge ndi ari yiru ange yanni yiru 'didanu na yanni yiru yi'duru (4.1-6)
5. Ämnär Ngwaalinga ngaa ämnäjidi (4.7-21)
6. Ämnär Kiji gidi Ngwaalu (5.1-21)

Ngwuja'ri Ngwudi Midi

¹ Änyängä lullu ngwuja'ri ngwudi midi ngwuju 'tu'tu gwerre ngwanni ngwu'dingini nje, nje engga ngwäy ngwe ngwäri nje inggidi nje akani nono ngwuy ngwe ngwäri ngwuru ngwee ngwaru nyii ngwe gweneno.

² Midi nggwee gwü'tädälü nyii engga nyii gwe ondaji, ara je be enggaci ndi ari ngwuja'ri ngwuru ngwudi midi gwudi gwur'taling gwanni gwuju ndi Papa gwuru Ngwaalu aar nje be 'täcälü.

³ Ngwuja'ri ngwanni ngwänggädi nje, nje 'dingini, ngwuru ngwondacara je ngwe nunnu ar gu acajidi ar gu emadanu gwüpäng. Ar emadi ndi acajidi gwüpäng na acajidi gwege nggwee gwuru Ngwaalinga le ngwuru Papa na Giji güngün gani Yicu Kirictu.

⁴ Änyängä lullu ngwuja'ri ngwee, nunnu a jayanu gwege ru gwanni gwumbutu.

Elle Buri gwe

⁵ Ngwuja'ri ngwuru ngwee ngwanni ngwu'dingini nje ndi Yicu ara je be ondaca. Ndi ari Ngwaalu ngwuru buri, dirim dere da'ti 'dünggüngün a'tur.

⁶ Ma be ari nunnu a lima ari gwacajidar le ar be ellele gidirimänü, a liru ngwu'duru na ellele gwege gwa ru 'tur.

⁷ A be manari a lima eelle giburalu anaku ru gu Ngwaalu buri, a la be äti acajiding gwüpäng 'didanu, na yin yidi Gijï güngün gani Yicu, yinje oyaji kengalu 'dar.

⁸ Manari a lima ari a la'ti ki, a la dudiyi yigo'ro yege na ngwuja'ri ngwanni ngwuru 'didanu ngwa'ti ngwa ji 'denggeganu.

⁹ Ma be ari alanga lima 'täjälü ndi ari a liki, nginde gwuru ligor le'te pu ngwüdünälü gwunje düdänijänü na gwunje ga'ru giyi'ral 'dar yege yanni yiki.

¹⁰ Manari a lima ari alanga la'ti ärrä yi'ral yanni yiki, gwa ar aniji di'duru na ngwuja'ri ngwüngün ngwa'ti 'dengge.

2

Ar eelle giburanu gwudi Ngwaalu

¹ Nggwüllijä je ngwuja'ri ngwee lani yijï yüny nunnu aa'ti ngaa la ärrï yi'ral yanni yiki. Ma be ari dïjï dere dima ärrï yi'ral yanni yiki, a läti Yicu Kirictung gwanni gwüdünälü gwati nje ruci ndi Papa.

² Nginde gwanni gwümi'ridi nje nono ligo'ro le lüngün aar nje ga'ru ndi ke gwege. Aa'ti be ke rüdi gwege 'dogo jücü, ngwube ru 'to ke gwudi ngwüjï 'dar gididlä.

³ Manari gwuma ar 'dengenaci ngwuja'ri ngwüngün, a la be lenge ndi ari gwülingidär.

⁴ Gwanni gwati ari, "Gwülingidiny," ngwu'ti be ärrä ngwuja'ri ngwüngün, gwuru di'duru na 'didanu gwa'ti 'dünggüngün.

⁵ A be gwere gwanni gwati 'dengenaci ngwuja'ri ngwüngün, gwuru diji dannä dämna Ngwaalinga ämning gwanni gwuru 'di'didanu. Yiru giyee yanni yati nje gäbici ar lenge ndi ari a gilo 'dünggün.

⁶ Ndi ari gwere gwanni gwati ari gwümätinälü 'dünggüngün, ngwelelle nono elella gu Yicu.

Yanni yinggida ndi ari Ngwaalu ngwämni nje

⁷ Lani ngwumaad ngwüny, ngwuja'ri ngwee ngwüllijä je ngwätüdi ngwuyang, ngwuru ngwuja'ri ngwanni ngwu'rin ngwu'dingina je 'tu'tu gwerre. Ngwuja'ri ngwee ngwuru ngwu'rin ngwuru ngwuja'ri ngwanni ngwu'dingina je.

⁸ A be nyi gwüllijä je ngwuja'ri ngwanni ngwuyang. 'Didanu gwudi ngwuja'ri ngwee nggwo gwenggana ndi Kirictu na 'danggalu ndi ari dirim ndo ndi abri kayanu a buri gwanni gwuru 'didanu gwuma be o'rralu.

⁹ Gwanni gwaru nggwo giburalu ngwube a be gwenggen ke ngwäy, nginde nggwona gidirimänü kaji nggoo.

¹⁰ Gwanni gwati ämni gwenggen, gwati elelle giburalu a yere ya'ti 'dünggüngün yanni yiki yadi gäbici ngwobalu.

¹¹ A be gwanni gwati gwenggen ke ngwäy, nginde nggwo gidirimänü, dinding gwänü a gwa'ti lingidi ndi ari gwadi ne. Gwuma dirim rimiyi ngwäy.

¹² Äny gwüllijä je ngwuja'ri ngwee lani yiji yüny ndi ari ke gwalu gwuma ara je Ngwaalu düdänijänü ndi Yicu Kirictu.

13 Äny gwüllijä je lani papanga, ndi ari gwülingidängä gwanni gwuju 'tu'tu gwerre gwani Yicu Kirictu. Äny gwüllijä je nga nga lanni liru ngwamal ndi ari ngaa lima obeda dijego'ralu. Äny gwüllijä je lani yiji yüny ndi ari ngaa lilingidi papang.

14 Äny gwüllijä je lani papanga ndi ari nga nga lilingidi ngindeng gwanni gwuju 'tu'tu gwerre. Äny gwüllijä je lanni liru ngwamal, ndi ari ngaa lojema nono, a ngwuja'ri ngwudi Ngwaalu ngwümätinälü 'danggalu, na ngaa lima obeda dijego'ralu.

15 Ngaa 'ti ämnä didläyü na yi'ral yere yidi didlä. Manari gwere nggwo gwati änni didläyü, gwa'ti gu änni gwudi papa.

16 Ndi ari yi'ral 'dar yidi didlä, nono ami'ra gwudi lingeno, ari ngwäy gwudi ngwong ngwudi didlä, gigi'tinälü gwudi lingeno gwanni gwätäng na ngwanni gwati je ngwüji ärrü, gwati 'ti indi ndi papa, ngwudi didlä ngwuru.

17 Didlä yi'ral yanu yüngün yanni yiki yanni yati ari ngwüjänü, ya dudi a be diji danni dati ärrü buping gwudi Ngwaalu, da midi miding gwudi gwur'taling.

Arnganar Ngwu'duru

18 Lani yijü yüny, gaji gima be ja gito. Lica je gwele gwerre ndi ari güwän gidi Kirictu ga ji gila. Gweneno gima be ila gonyadu gima 'täädälü, a la be lenge ndi ari gaji gima be ja gito. Güwän nggee gi'tüdi 'denggeganu ndi ari gati ar le acajidi gwerre,

¹⁹ aar be 'tü aar nje gatani. Adinari lacajidar le ki'du ge'te pu 'didanu, laadi ar le jalu. Liminje be gatani ndi ari ngindenga lä'tüdi lidi gi'du gege.

²⁰ A be nga nga, lima je Ngwaalu maji ligi'rimä nono Yicu gwe, na no, nga nga 'dar yilingidi je yanni yiru 'didanu.

²¹ Äny gwa'ta je üllijä ndi ari nga nga la'ti lingidi 'didanung, a be ndi ari nga nga gwülingidängä, ngaa lenge 'to ndi ari yi'duru yere ya'ti ngwuja'ranu ngwanni ngwuru 'didanu.

²² A be yäru gwanni gwuru di'duru? Dijji diru danni dati ari Yicu gwä'tüdi gwanni Gwubrutar yelenya. Dijji danni diru gu no, diru güwän gidi Kirictu diru danni dati 'donya Papang na Giji.

²³ Ndi ari dijji dere danni dati 'donya Gijü, da'ti äti Papang. Gwere gwanni gwati änni Gijü, gwati änni 'to Papang.

²⁴ Mätinär bälü ndi määtä ngwuja'ri giyig-oranu ngwanni ngwu'dingina je 'tu'tu gwerre ngaa gu mätinälü 'di'däny. Manari ngaa gilo gu, ngaa 'to la mätinälü Kiji na ndi Papa.

²⁵ A yiru giyee yanni yicaar nje ye Ngwaalu ndi ari gwunje ätäda 'to miding gwudi gwur'taling.

²⁶ Äny gwüllijä je ngwuja'ri ngwee nga je girinya gwani ngwüji ngwanni gwati mini ndi ara je i'däjänü aar je oktada 'ter ngaa dudi.

²⁷ A be 'danggalu, Kirictu gwuma je maji ligi'rimä nono limätinälü 'danggalanu ngaa la'ta be minä dijü dere ndi ara je enggaci mana yanni yiru 'didanu. Ma be ari ligi'rim

lüngün līmätinälü 'danggalu ndi ara je enggacalu pipi'ri'ti, a liru ligi'rim lanni liru 'didanu lä'tüdi yi'duru, mätinärälü 'dünggüngün anaku enggacara je gu.

²⁸ A be gwenene lani yiji yüny, mätinärälü 'dünggüngün nunnu ma ji mung 'tädlü, aa'ti yedeny yinje eny a nje yaaru ape komon ganni gading ge o'ra.

²⁹ Manari ngaa lilingidi ndi ari Kirictu gwuru gwanni gwüdünälü, ngaa la gu be lenge ndi ari diji dere danni dati ärrü yi'ral yanni yidünälü, diru giji gidi Ngwaalu.

3

Yiji yidi Ngwaalu yati dünälü

¹ Änggädär ämning gwuru 'taa gwudi Ngwaalu ngwuru Papa, gwanni gwämnäär nje gwe! Ämni gwüngün gwupa gwulleney 'di ndi ari liminje ci, “yiji yidi Ngwaalu.” Na a liru gu yiji yüngün 'didanu. Yiru giyee yanni yigäbica ngwüjü ngwudi didlä aar nje 'ti be lingidi ndi ari ngwüji ngwudi didlä ngwa'tina lingidi Ngwaalinga.

² Gwenene lani ngwumaad ngwüny, a liru yiji yidi Ngwaalu, a be ya'ti linginna ndi ari gweere a ladi ru 'taa. A be a lilingidi ndi ari ma ji ma Kirictu 'tädlü, a la ru nono ngindeng, nunnu gwa ar engga anaku rung gu 'didanu. Diji dere danni däti ge'tajing nggwee giligoranu lüngün ndi Kirictu, dati ju'riyi lingina lüngün

³ anaku ju'riya gu Yicu lingina lüngün.

⁴ Diji dere danni dati ärrä yi'ral yanni yiki dati kiyi yobo yidi Ngwaalu 'didanu yiru ndi ari yi'ral yanni yiki, yani kiyi yobo.

⁵ A be ngaa lilingidi ndi ari Kirictu gwüllü ndi äbrä yi'ral yidi ngwüji yanni yiki, ngaa lilingidi ndi ari nginde gwä'tüdi diji danni diki.

⁶ Gwere gwanni gwümätinälü 'dünggüngün, ngwa'ti gwa ji ndi gwujani yi'ral yanni yiki. A be gwanni gwa ji ndi gwujani yi'ral yanni yiki gwur'tal, gwa'ting änggädi na gwa'ting lilingidi.

⁷ Aa'ti diji dere da je oktada ndi dudi lani yiji yüny. Gwanni gwati ärrä yi'ral yanni yidünälü, gwuru diji didünälü, anaku dünü gu Kirictalu.

⁸ Gwanni gwa ji ndi gwujani yi'ral yanni yiki gwur'tal, gwuru giji gidi dijego'rr ndi ari dijego'rr diru danni darrä yi'ral yanni yiki 'tu'tu gwerre. Yiru yanni yigäbicä Gijü gidi Ngwaalu ngwüllä ndi ari ngwuje äbrä yanni yima ji dijego'rr ärrä.

⁹ Gwere gwa'ti gwuru giji gidi Ngwaalu gwati ji ndi gwujani yi'ral yanni yiki gwur'tal, ndi ari ligi'rim lidi midi Ngwaalu lima ji 'dünggüngün, ndi ari gwa'ti gwa ji ndi gwuji yi'ral yanni yiki gwur'tal ndi ari gwuma ru giji gidi Ngwaalu.

¹⁰ Yiru giyee ndi ari awa a ladi lenge yiju yidi Ngwaalu 'ter giyijänü yidi dijego'rr ndi ari gwere gwanni gwati 'ti ärrä yi'ral yanni yidünälü na 'to gwere gwanni gwati 'ti ämnä gwenggen, gwä'tüdi giji gidi Ngwaalu.

Ämnäjädär

¹¹ Ngwuja'ri ngwanni ngwu'dingina je gwerre ngwuru ngwee, ndi ari ar ämnäjidi.

12 Aa'ti a la ru nono Gayining, nginde gwanni gwuru giji gidi dijego'rr ngwümäätä gwenggen gwani Äbiil ngwu'rinye. Gayin gwarra ngwube 'rinye gwenggen gwani Äbiil? Yä'tüdi mene ndi ari yi'ral yüngün ya'ti dünälü ngwäyänü Ngwaalu a be yi'ral yidi gwenggen gwani Äbiil aar be dünälü ngwäyänü Ngwalo?

13 Yäy gu no aa'ti ngaa lobalu, lani ngwänggäri manari nga lima ke ngwüjü ngwäy ngwudi didlä.

14 A lilingidi ndi ari alanga lima gatana gay gidi yi'rany a lima elada ndi midi, na lilingidi gu no ndi ari a lati änni gwengga. Gwanni gwati 'ti ännä, nggwo gu na yiimala yidi yi'rany.

15 Gwere gwanni gwati gwenggen ke ngwäy, gwati 'rinyidi. Na ngaa lilingidi ndi ari gwere gwanni gwati 'rinyidi, gwa'ti äti miding gwudi gwur'taling 'dünggüngün.

16 A lilingidi ndi ari änni gwani yärü, ndi ari Kirictu gwayu gwani alanga. Alanga 'to la dodaji yigo'ro yege ngweengga!

17 Dijji danni däti ngwony ngwudi lingen ngwube engga gwenggen gwanni gwuru diwayi ngwu'ti be inädi, awa ngwube ari dännä Ngwaalinga.

18 Lani yiji yüny, änni gwege aa'ti gwa ru ngwuja'ri ngwudi ngwulem 'dogo ngwube ru änni gwanni gwuru 'didanu giyi'ral yanni yati ar je ärrä.

19 Yiru be giyee yanni yati nje gäbici ar lenge ndi ari a liru ngwüji ngwudi 'didanung. Yiru giyee yanni yadi nje gäbici ar dünä ligor le la'ti yedenyanu ngwäyänü Ngwaalu.

²⁰ Ma be ari yigor yiminje mi'ränü, ar lenge ndi ari Ngwaalu ngwupana giyigor yege na ngwuru ngwanni ngwülingidi ngwuja'ralu 'dar.

²¹ A no lani ngwumaad ngwüny, ma be ari yigor yege yiminje 'ti mi'ridänü, yedeny ya'ti yinje eny ngwäyanü Ngwaalu.

²² Ya ar je mbuji 'dünggüngün 'dar yanni ya ar ye otacalu, ndi ari gwati ar 'dengenaci ngwuja'ri ngwüngün ar ärrü yi'ral yanni yati gäbici ngwujayanu.

²³ A ngwuja'ri ngwüngün ngwanni ngwaru ngwe ngwuru ngwee ndi ari ar ämnü Gijü güngün gani Yicu Kirictu na ar ämnäjidi gwüpäng.

²⁴ Lanni lati 'dengenaci ngwuja'ri ngwüngün, limätinälü 'dünggüngün na nginde gwümätinälü 'denggen. A yiru giyee ndi ari awa a lilingidi ndi ari nginde gwümätinälü 'dengge, ndi ari a lilingidi gu ligi'rim le lanni latädaär nje.

4

Ligi'rim lidi Ngwaalu na ligi'rim lanni liki

¹ Lani ngwumaad ngwüny, aa'ti ngaa lämnü ngwuja'ri ngwudi ligi'rimälü rügüm, ngaa be manni iye ngwügi'rimä ngwäy nono ndi aang lenge ndi ari ngwindi Ngwaalu. Ndi ari ngwijir ngwo ngwonyadu ngwuru ngwu'duru ngwuma 'tü ngwuma badalu gididlänü.

² Yiru giyee yanni yati nje gäbici nda be lenge ligi'rimä lidi Ngwaalu, ndi ari ligi'rim lere lanni

lati ari Yicu Kirictu gwändi gilingeno, liru lidi Ngwaalu.

³ A be ligi'rım lere lanni lati 'donya ngwuja'ri ngwee ngwani Yicu, lä'tüdi ligi'rım lidi Ngwaalu, liru ligi'rım lanni liru güwän gidi Yicu lanni li'dingina le ndi ari ladi ila, a gilo lima obana gwenene gididlä.

⁴ Ngaa liru lidi Ngwaalu, lani yiji yüny. A lima je dami lidi didlä ndi ari gwanni nggwo 'danggalanu gwojemana nono giligi'rım lanni gilo ngwüjänü ngwudi didlä.

⁵ Ngindenga liru ngwüji ngwudi didlä ngwati ondaji ngwuja'ri ngwudi ngwong ngwudi didlä ati je be ngwüji ngwudi didlä 'dengenaci.

⁶ A be alanga liru lidi Ngwaalu. Dijji dere dannı dilıngıdi Ngwaalinga, dati nje 'dengenaci. A be gwere gwanni gwä'tüdi gwudi Ngwaalu, gwati nje 'ti 'dengenaca. Yiru giyee yanni yati nje gäbıci ar be ngengedani ngwuja'ranu ngwudi ligi'rım liru 'didanu ngwuja'ranu ngwudi ligi'rım lanni liru di'duru.

Ämni gwudi Ngwaalu na ämni gwege

⁷ Lani ngwumaad ngwüny, gäbıcar ar ämnäjıdi ndi ari ämni gwändi Ngwaalu. Gwere gwanni gwati ämni, gwuru gıji gidi Ngwaalu na gwülingıdi Ngwaalinga.

⁸ Gwere gwanni gwati 'ti ämnä, gwa'ti lingıdi Ngwaalinga, ndi ari Ngwaalu ngwuru ämni.

⁹ A yiru giyee yinggida ndi ari Ngwaalu ngwenggaci nje ämning gwüngün awa. Ndi ari ngwükäjä Gıju gwüngün ganni giralu ge'te pu gididlä ndi ari nunnu ar ge gilang.

¹⁰ Änni gwuru nggwee, ndi ari a lä'tüdi lanni lämnä Ngwaalinga, a be Ngwaalu ru ngwanni ngwämni nje 'di aar ükäjä Gijü gwüngün aar nje mi'rini nono aar nje ga'ru ndi ke wege.

¹¹ Lani ngwumaad ngwüny, anni ämnär nje gu Ngwaalu no, gäbicär be ar ämnäjidi gwüpäng.

¹² Dijji dere da'ti a'tur dannii dänggädi Ngwaalinga. Ma be ari alanga lämnäjidi, Ngwaalu ngwa ji 'dengge na änni gwüngün, gwa mbuti 'dengganu.

¹³ A lilingidi ndi ari nggwo gwümätinär gu a nginde nggwo gwümätinälü 'dengge. Ndi ari nginde gwuminje ätäda ligi'rimä lüngün.

¹⁴ A alanga lima engga, a lima ondaci ngwüjü ndi ari Papa gwuma ükäjä Gijü gungün gwuru gilang gwudi ngwüji gwudi didlä.

¹⁵ Manari dijji dere dima änni ndi ari Yicu gwuru Giji gidi Ngwaalu, Ngwaalu ngwa mätinälü 'dünggüngün a nginde gwa mätinälü Ngwaalu.

¹⁶ A gu no gwenene, a lilingidi ar gatada ngwäyanü ndi änni gwanni gwätädäär nje Ngwaalu.

Ngwaalu gwuru gwati änni ngwüjü. A gwere gwanni gwelella änni gwe, gwümätinälü Ngwaalu a Ngwaalu mätinälü 'dünggüngün.

¹⁷ Gay ge nggee, änni gwati nje gu mbutanu ndi ari aa'ti yedeny ya ji komon gidi obalu ndi ari engene gididlä ndee, a liru nono Kirictu.

¹⁸ Yedeny ya'ti ndi änni, a be änni gwanni gwumbutu gwati 'tüyü yedenyanu, ndi ari yedeny yati ji yani yi'redeny. Gwanni gwati yedeny eny, gwami'ratu ndi änni.

19 Alanga lati ämnäjidi ndi ari Ngwaalu ngwuru ngwämnä nje gwerre gwerre.

20 Manari gwere gwuma ari, “Äny gwämnä Ngwaalinga,” ngwube gwenggen ke ngwäy, nginde gwuru di'duru. Ndi ari gwere gwanni gwati 'ti ämnä gwenggen gwanni gwating engga, awa ngwube ämnä Ngwaalinga ngwanni ngwa'ting je änggädi.

21 A nginde gwuminje ätäda ngwuja'ri ngwüngün ngwee ndi ari gwere gwanni gwati ämnä Ngwaalinga, ngwämnä gwenggen 'to.

5

Ämnä Kiji gidi Ngwaalu

1 Gwanni gwati ämnä Ngwaalu ndi ari Yicu gwuru gwanni Gwubrutar yelenya, gwuru Giji gidi Ngwaalu, a gwanni gwati ämnä Papang, gwati ämnä Gijü güngün 'to.

2 Gay giru nggee gadi ar ge lenge ndi ari awa a lämnä yijü yidi Ngwaalu, ndi ari ämnä gwe gwege Ngwaalinga na 'dengenaji gwe gwege ngwuja'ri ngwüngün.

3 Ämnä Ngwaalinga gwege gwuru nggwee, ndi ari ar 'dengenaci ngwuja'ri ngwüngün. A ngwuja'ri ngwüngün ngwa'ti ni 'dengge.

4 Ndi ari gwanni gwuru giji gidi Ngwaalu, gwäti yiima ndi dami didläyü. A dami gwege gwuru nggwee gwanni gwuma dami didläyü, ämnä gwe gwege ndi Yicu.

5 Yärü gwuru gwanni gwadi dami didläyü? Dijji de'te pu diru danni dati ämnä Ngwaalu ndi ari Yicu gwuru Giji gidi Ngwaalu.

Ondaci ngwüjü Yicu gwe

⁶ Yicu Kirictu gwuru nggwee gwe'te pu gwanni gwindi yaw ye yani nyinyini gwüngün na yin ye yüngün yani yi'rany yüngün. Nginde gwa'ti indi yaw ye 'dogo, a be gwindi yaw ye na yin ye yüngün. A Ligir'im liru lanni lati inggidi nginde gwe na yanni yinggida ye Ligir'im, yati ngway ndi ari liru Ligir'im 'didanu.

⁷ Ndi ari liru tä'r'il (3) lanni londaja kerala,

⁸ ligir'im na yaw na yin. 'Dar gilee liru tä'r'il (3) ondaji gwegen gwuru gwe'te pu.

⁹ A lati änni inggiding gwudi ngwüji, a be inggidi gwudi Ngwaalu gwupana, a ngwondijaja kiji güngün.

¹⁰ No lanni lati änni Kiji gidi Ngwaalu, läti ondajing nggwee giyigoranu yegen. A be lanni lati 'ti ännä Ngwaalu, lima ruji Ngwaalinga di'duru ndi ari ngindenga lati 'ti ännä ngwuja'ri ngwanni ngwaru ngwe Ngwaalu Kiji güngün.

¹¹ Inggidi gwinggidaar gwe gwuru nggwee. Ndi ari Ngwaalu ngwuminje ätäda miding gwudi gwur'taling na miding nggwee gwindi Kiji güngün.

¹² Gwanni gwäti Gijü, gwäti miding nggwee. Gwanni gwa'ti äti Gijü, gwa'ti äti miding nggwee.

Midi gwudi gwur'taling

¹³ Äny gwüllijä je ngwuja'ri ngwee nunnu ngaa lenge ndi ari ngaa läti miding gwudi gwur'taling, ngaa lanni lämnä Kiji gidi Ngwaalu.

¹⁴ Yiru giyee yanni yati nje gäbici a nje 'ti yedeny iti ndi 'donggaci Ngwaalinga. Ndi ari manari yere yanni ya ar ye otaci Ngwaalingalu

yanni yändäär bupi gwe gwüngün, ya aar nje 'dengenaci.

¹⁵ A manari a lilīngidī ndi ari nginde gwati nje 'dingini giyi'ral yere yanni yati ar ye otacalu, a la be lenge ndi ari ya ar je mbuji yanni yotacar yalu.

¹⁶ Manari gwere gwati engga gwenggen ndi ärrī yi'ral yanni yiki yanni yati 'ti üktädi giyi'rany, gäbīcä ngwotaci Ngwaalingalu a gwa Ngwaalu ätä miding. Yi'ral giyee nggwärädī gu ngwüjī ndi ke gwegen gwanni gwati 'ti üktädi giyi'rany. A be ke nggwo gwe'te gwanni gwati oktada yi'rany. A be äny gwa'ti aru nga otaci Ngwaalingalu giyi'ral giyee.

¹⁷ 'Dar yanni yati ärrīnī yiki, yiki ngwäyänü Ngwaalu. A be ke nggwo gwe'te gwanni gwati oktada giyi'rany.

¹⁸ A lilīngidī ndi ari gwere gwanni gwuru gijī gidi Ngwaalu gwati 'ti ju ndi gwuji ärrīng gwanni gwuki gwur'tal, ndi ari gwuru gijī gidi Ngwaalu gwati gu Ngwaalu etadala, a dijego'rr da'ti da ang alliji guy nono.

¹⁹ A lilīngidī ndi ari a liru yijī yidi Ngwaalu na ndi ari dīdlä 'dar ndee ndo kuyanū gidi dijego'rr.

²⁰ A lilīngidī 'to ndi ari Gijī gidi Ngwaalu gima üllä na giminje ätädänī bebereng, nunnu ar lenge ngindeng gwanni gwuru 'didanu. A alanga gilo 'dünggüngün gwanni gwuru 'didanu Kijī güngün gani Yicu Kirictu. Nginde gwuru Ngwaalu 'didanu a midi gwudi gwur'taling.

²¹ Lani yijī yüny, etadar giyigo'ro yalu giyi'remna yidi dīdülä yidi dīdlä yanni yiru 'tur.

Laro Bible (Bible)
Laro NT

copyright © 2020 Wycliffe Bible Translators, Inc.

Language: (Laro)

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-19

PDF generated using Haiola and XeLaTeX on 25 Aug 2024 from source
files dated 29 Jan 2022

80c639f7-4569-5ffa-a77d-5df4c223631f